

115 年全國語文競賽臺灣原住民族語言朗讀文章 【郡群布農語】 國小學生組 編號 2 號

malusbut mapasnanava tu Bukun

Masa habasang dau tu isainangcin dau a Lipunan hai aiza dau a tacini a maapatasang a uvaaz a kunian tu Bukun a mapasnanava sia kai'unias Lipun tu Pasnanavaan. Ung at, aupa maaz dau a isaicia a lumah hai maldahvi dau mas Pasnanavaan at nii tu maszang mas duma tu mal'aisku mas Pasnanavaan tu uvaaz tu mahtu tunsuhissuhis kaulumah masabah mais maipasnava tu hanian at asa dau tu tunnasia tas'an dikut masabah.

Aupa maaz a Bukunan hai laupaang satuun mapunsia Pasnanavaan mapasnava at masmuav dau tu kaumanang a painsanan i kaazang dau punnum tu painsanan at matukulaaz tu kaumasikt mais saduan at mastanin tu atukalakinun mais saduan. Maupa mus'anang sisbai sia tamacina hai mapisingdaingaz dau a saia masa na satuun mapunsia pasnanavaan at kaazin dau a saia ka kamangmangan mas isaicia tu tama cis'ama masatu mapunsia Pasnanavaancia. ung at, sipisingan dau mas tama tu mais ka macisbai a kasuun hai na ludahunkuas tutupa mais macisbais sia Pasnanavaantan. Ung at masa mudaanin dau a isia a tama hai mastanin dau a saia mapisingi uncinia at mapisingis pa'anakan mas madadaingin tu uvaaz at mapising mais intushungun satamalan mas duma tu maapatas tu uvaz at mastanin dau mapising mais nii tu uhaiapan mais isnavaan i na haungunun mas masnanava tu Lipun at na pahainanan mas aluskunan tu uvaaz.

Inaiza dau tu taunasia islunghuan tu hanian tu taunasiaanin sia na is'usuhis kausia Pasnanavaan mas Bukuntan tu hanian hai satuun dau a saia mas isaicia tu cina masatu pansia na tautaluhan kausia isaicia tu Pasnanavaan hai simangmang dau a Bukunan simananu tu na nii tu mudaan kausia pasnanavaan at siza dau a isaicia a cina mas batu mapitbatu lababatu sipising mas Bukuncia at tudiipin dau a Bukun a minglangatlangat mudaan kausia pasnanavaan mapasnava.

Ung at, tailpin dau tu hanian at macicidun dau a isia cina a sia taulavinaan mas habang tu na ispapainukun mas Bukuntan mais mainduduazin hai saduas sia dau a Bukunan uaskavandii minsuma at tupaun daus cina tu islunghuinam ua minsumatan ? vivingving dau a ituBukuncia a bungu at cinhaiap a isia a cina tun a macisbaia siaan sia Pasnanavan i maupatan at kasuuas isia tu cina a cicindunun a na mungabin kanahtungan a habang a mahalcis ma'istup.... ung at, tudadauk dau a isia a Cina a tupa tu, maszang a cicinduunun a habangan mas isuu tu paisnanavaan..., ung at, taisduungun dau a Bukun a at tangis dau a Bukun a at paiskatudiipin dau a Bukunan halusbut mapasnananva sia Pasnanavaan.

115 年全國語文競賽臺灣原住民族語言朗讀文章 【郡群布農語】 國小學生組 編號 2 號

認真求學的 Bukun

文章來自日本時代，一位布農小孩在求學期間，因年紀小，又寄宿別人家。在學校怕被霸凌，怕上課學不來遭老師罵、同學笑，憤而逃。布農母親以剪斷織布機上將要織成禮服的織布，教育 Bukun 學習不可以前功盡棄與堅持不放棄的精神。